

*Infomail vum SNE/CGFP zum RTL - Podcast "Drëtt Hallschent" vum 15. Mee mam Nicole Kuhn-Di Centa, Presidentin vun der LASEP.*

### **ESOU NET, MADAMM PRESIDENTIN!**

Fir d'alleréischt wëlle mir ervirsträichen, dass mir en immens grouse Respekt virun der Aarbecht, dem Asaz an der Kompetenz vun de Kolleginnen a Kollegeen aus den Associatiounen Art à l'école, LASEP a MUSEP hunn. Dës Associatiounen erlaben et eise Kanner, ausserhalb vum reguläre Schoulhoraire artisteschen, musikaleschen oder sportlechen Aktivitéiten nozegoen. Dës para-periscolaire Aktivitéite gesäit den SNE/CGFP als immens wäertvoll a wichteg un. Ausser dem Constat, dass dës dräi Associatiounen eng remarkabel Aarbecht am Interêt vun de Kanner leeschten, géife mir eis et awer nimools erlaben, eis iwwer den interne Fonctionnement vun dësen Associatiounen auszeloossen a Kommentaren oder Kriticken dozou ofzeginn.

Dofir si mir och virum Lauschtere vum Podcast "Drëtt Hallschent" vum 15. Mee mat der Presidentin vun der LASEP dovunner ausgangen, dass dëse Podcast sech géif em d'LASEP dréinen a net haaptsächlech em de Fonctionnement vun der Grondschoul.

Entsat ware mir als SNE/CGFP dunn awer iwwer d'Aussoen, déi d'Presidentin vun der LASEP an dësem Podcast gemaach huet. D'Madamm huet nämlech net nëmmen iwwer d'Wichtigkeet vum Sport fir d'Kanner am Allgemengen an d'Bedeutung vun der LASEP fir de Schoulsport am Spezielle geschwat, mee si huet sech haaptsächlech iwwer de schlechte Fonctionnement vun der Grondschoul an iwwer déi mangelnd Qualitéit vum Enseignement, an dobäi besonnesch vum Sportunterricht, ausgeloo. Schold dorunner wieren haaptsächlech d'Enseignanten, déi net iwwer genügend Kompetenze géife verfügen, fir de Sportunterricht ze halen, deenen et un Engagement géif feelen an deenen d'Work-Life Balance haut méi wichteg wier wéi, salopp gesot, hir Aarbecht. Dat kënne mir als SNE/CGFP net einfach esou am Raum stoe loossen. "Philosophéiert" gouf ënnert anerem och iwwer Theme wéi e Mangel u Qualitéit an der initialer Ausbildung vun den Enseignanten, d'Widderstänn vun de Gewerkschaften, d'Virdeeler an d'Nodeeler vum Generalist a vum Spezialist an der Grondschoul, d'Déchargesstonne bei den Enseignanten, d'Wichtigkeet vun de sougenannten Niewefächer vis-à-vis

vun den Haaptfächer Däitsch, Franséisch a Mathematik, de Fonctionnement vun den Direktiounen an de Rôle vun den Elteren an hir Angscht, hir Meenung beim Enseignant zum Ausdrock ze bréngen.

Als SNE/CGFP wëlle mir op dëser Plaz net am Detail op all déi Themen agoen, déi an dësem Podcast ugeschnidde gi sinn. Mir wieren eis awer mat aller Vehemenz géint all Frontalattack a Pauschaliséierungen, déi géint d'Enseignantë geriicht sinn. Mir loossen et och net zou, dass d'Aarbecht an d'Ausbildung vum Enseignant denigréiert an duerch den Dreck gezu gëtt.

Dass de Sport am Allgemengen an de Schoulsport am Spezielle vu grousser Wichtigkeet fir d'Kanner sinn, steet fir den SNE/CGFP ausser Fro. Nëmme e Kand wat sech och gutt a senger Haut spiert a wat gutt a Form ass, kann och gutt schoulesch Leeschtunge bréngen. Ze behaupten, de Sport wier den Enseignanten net wichteg a si géifen do net deen néidegen Asaz weisen, dat ass einfach falsch. Den Enseignant gesäit d'Kand als Ganzt a fir hie sinn all d'Fächer wichteg. Den Enseignant hält all seng Fächer mat där néideger Kompetenz an deem néidegen Engagement, egal op dat elo déi sougenannten Haaptfächer wéi Däitsch, Franséisch oder Rechne sinn, oder déi sougenannten Niewefächer.

Der Presidentin vun der LASEP wëlle mir just mat op de Wee ginn, dass all déi LASEP-Sektiounen uechtert Land zanter Joren a Joerzénge och just Dank dem Engagement, der Kompetenz an dem Devouement vun Enseignanten an Educateure bestinn.

À bon entendeur, salut!

De Comité central vum SNE/CGFP